

کیچہ کی ہر ای ژان وینی اشناری وختو سوم جوستہ بدل باؤ گویان پرورش تان چقہ انسانو ذندگی دی مختلف مرحلین پھائے شوخشاؤ گویان۔ خیق اژوران وا بوردی انوسار انوسوت خور باؤ گویان۔ اولی چیق، بوردی فہمیدہ بیٹی جوان تیسوم سال خوردہ بیٹی اکھایر بویان۔ ہش تان چقہ ای پھوردو کی اژوران انوسار انوسوتے بوردی ای شخال واخل کان غیروران۔ ہے قسمہ تان وارو موژا دی تبدیلی گیاؤ گوئے وا بیس ہرونی زیاد دی بویان کی ہورو ہے زبانو لو دیاک وا نیویشاک دی ہوش نو کویان۔ مثالو طورا ای خیق تان اژورو ژاغو پیشھی خور ژاغا بی بو مودا اچہ تان دیہوتے کی گویان تھے دیہورئے ہو نو فرقیان۔ ہے قسمہ تان فطری تبدیلیو وجہین زبان دی انوسار انوست خور بیٹی فرق نایوران۔ ہے خور بیکو موژی خور وارو لفظان گانیران وا تان لفظان کھیو تونجئے کھیو بدل کوری تبدیل بیکو راہہ پیشھوران۔

ہمی تبدیلیان کیاوتکی ای زبان دان سورا نیزیکو کوششو کورویان تھے ای طریقو سورا کوشش کویان وا ہے کوشش شیلوغ بڑاٹھٹیک بویان۔ بیس شیلوغ دیاک رویان سار شیلوغان گانیران وا ہے موژی لوژیکو سورا ہوروتے کافی ہش الفاظ ملاؤ بویان کی ہتیت بالکل ہے وارار نیسیرو بویان۔ ای زبان کیاوتکی ختم بیکو خطرو سوم دوچار بویان تھے بیس غیژی ڈشو نو دویمان بچومکہ تان سوم جوستہ ای تاریخ، ای ثقافتو گانی تونج بویان۔ اگرکہ ہے تونج باک ثقافتو شیلوغ کی بڑاخ اوشونی تھے ہورو نوغدار زندہ بچٹیکہ ہیت دہکارہ گویان۔

ہر کوس تان کیشیپیوغ رے کھوارہ متال شیر وا بیہ متال البتہ کی شیلوغ دیاک رویان بچین صحیح نو مگر ہر کوس تان انداز کی ریتام مہ خیالہ بو شیلی بوئے۔ کوریکو کی بیہ زمانا ہے روئے بو قیمتی وا اسپہ خوش وار کھوارو لوٹ حصو شیلوغان ذریعا محفوظ کوری اسونی۔ ہش الفاظ کی ہنون زمانا ہتیتان استعمال نو بویان اردو یا شک وارو الفاظ ہتیتان ژاغو گانی شینی اسپتے شیلوغو موژی غوش نہ غوشی کوریکو معلوم بویان۔ بیغار علاوہ ہے شیلوغ دیاکان ذریعا اسپتے قدیمورسم و رواج دی معلوم بویان۔ ہے شیلوغ دیاک روئے کوس دورہ کی غم بویان ہتیرہ بی قارقانو چھویو غم ژونی رویانتے شیلوغ دیتی ہیتان کھون کویان۔ ہمیتان سار علاوہ دی بو خور خوبی ہے شیلوغ دیاکان موژہ شینی۔

ای کما الفاظ متے دی ہے شیلوغ دیاکان ذریعا معلوم بیٹی شینی کی ہتیتان استعمال کھوارہ ہنون زمانا بو کم بویان بچونکہ نو تان بویان کی ریتام دی کیہ غلط نو بوئے۔ ہیتان موژا ای کمایین اوا تان قدردان راکان پروشٹہ پیش کوریک مشکیمان ہیت ہمیت شینی:

"شالجو، مستو، ژاوان، نیونگ، منارہ وا اوژونگ" شالجو اوچے مستو ہتے روئے بیرانی کی کا کی ای بیٹی غاریہ ای شالی ہال باؤ استانی وا ہیت جو دورار بوغاک بیرانی، ہیتان ہے رشتو نام شالجو وا مستو بیرائے۔ ژاوان پریو سار تور پرو آفتوت راک بیرائے وا منارہ ہاؤلیو دوواہتو ٹیکی لاکھیرو ہے اوشوانتے راک بیرائے وا ہیت تروئے یا پونج باک بیرانی۔ کھانجو آخری رادو پورا بیکو اچی ہیتان بیش ہے دوواہتو ٹیکی لاکھاک بیرانی۔ اوژونگ رے موخینی ای دار درے ہتے بسترہ درے شام بیکو ہتے بستران یو گانی موژ جامئے پوراک بیرانی وا چھوچھی اہی روپھی بڑاٹھٹے ہیتان ہے اوژونگی پیشھاک بیرانی۔ بیس آورینی یا لوٹ تھیاقو غون دار باک بیرائے کی ہتو ای پھور ہے موخینو موژہ ٹھونی چوکاک بیرائے وا ای پھور ای کونا ٹھونی۔

شیلوغ شروع کوراوا "بیرائے نو بیرائے استائے نو استائے۔۔۔" ، "وختہ مائے وختہ ای۔۔۔" ، "اوا تہ چانگیم تو ما چانگیس، انوس چھویو چانگیر روشٹ چھاغو چانگیر۔۔۔" ، "تیلی سیرہ یی نیسی ژوژی سیرہ پھار نیسی۔۔۔" بو بو ہش طریقہ شینی کی ہتیت ہر کوس جدا جدا۔ وارو سورا کا کی کوروم کویان ہتیتان ہے بارا الگ الگ رائے شینی۔ ای پھت رینیان کی "استائے نو استائے بیرائے نو بیرائے۔۔۔" ہتے شیلوغ کھیو بارا کی معلوم نو اوشوئے کی بیہ صحیح یا کی غلط رے استعمال کونی وا پھتی رویان ہش خیال کی بیس ہر ای شیلوغو سوم استعمال بوئے۔ اوا کندوری کی شیلوغ دیاک رویان سار ہے بارا بشار کوری سوم متے بیہ جواب ملاؤ بیٹی شیر "اسپہ کارہ کیاغ کی توری شیر ہتو اسپہ لو دوسیان باقی بیس صحیح یا کی غلط معلوم نکے،" وا ای پھتیو پرورش خیال کی شیلوغ کندوری کی شینی سف چانگیک البتہ کتابی قصہ کا کی کویان ہتیتان موژہ صداقت شیر۔

بہرحال کیاغ کی بویان شیلوغان تان پازہ محفوظ کوری ہمی روئے اسپہ خوش وار کھواروتے بو لوٹ خدمت کوری اسونی۔ ہمی رویان کندوری کی اشتیکھٹیتام ہانی کم۔ کی چقہ کی شیلوغو شروع کوریکو غیژی غیژی طریقہ شینی وا ہورو نیسی نیزیکو دی مختلف طریقہ شینی۔ مثلاً "ای نوغہ تو درے اوپتی نوغہ پروزیتائے" ، ای نوغورہ تو درے اوپتی نوغورہ پروزیتائے" ، "قصہ ختم پیسہ ہضم" یا "بیکو دی اوا ہتیرہ بس اوشتام ہنیسے ہتیغار ہاتام" ہمی لووان سورہ ہیت ہے شیلوغو ختم کونی۔ مثالو بچین ای اسکوردی شیلوغو، شیلوغ دیاکو طرزا دیتی نیسی نیزیمان:

"بیرائے نو بیرائے، استائے نو استائے، ڈوکو دیکو ڈوک نیسائے، خمو دیکو خم نیسائے، تیلی سیرہ پھار نیسائے ژوژی سیرہ یی نیسائے، یوروانو یور مہ پالیتائے، چیلابو اوشاکی مہ ترانگیتائے، پونگ کوش بیٹی دوغور روئی بو موچوکی، ریگیش گیتی پازو

دیتی تان شیرین ژانو پھانہ لاکھی اوا بتیرہ تورتام، توریکار اچی دی اوا ته چانگیم تو ما چانگیس انوس چھویو چانگیر چھوئے روشتو چانگیر، کا کی چانگی اسور چانگا کو گردانہ---- وختہ مائے وختہ ای ژو ای زومو روغین تان اشکارو خیالہ بوغاؤ استائے، ہانیہ تان بہت پھار نیسیرو کی پردوم زومو پاڑہ پوری اسور، ژو تو پوشی سخت بوپتوئی تو گونہ بی ناچار بیٹی ڈوق دیتی نیسیکو پردوم تو دیش لوڑی کیانی ہوؤ ریکو ژو ناچار بیٹی کیا نولہ استاد چھوئے کویان رے اسور--- پردوم راردو کی چھوئے کوکو مہ گونہ گیتی ڈوق دیتی کیہ اہتی بوسانہ، پھائے رو بی تانتے کورہ اشکار کو--- کورہ خاڑاؤ ماڑاوان دوسی ژیبے اہتی بوس ریکو ژورے اسور کی ہائے استاد ہے پھوک خاڑاؤ ماڑاوان سورہ کیہ گزارہ نو بویان لوٹ اشکار کوکو اوا نو بومان مہ ژانوتے ستم بیٹی شیر۔ ژو راردو دی استادئے کورہ لوٹ اشکار کوریک مہ چیچھاوے کی یہ دنیا نو! ریکو پردوم راردو کی بو کورہ لوٹ ژاندار لوڑی گئے اوا ته چیچھنیم مہ ژان ته پوشی کروچ ہوئے--- ژو بو بو خوشان بیٹی بوغدو وا اچی گیتی پردوموتے راردو کی استاد خور کیاغ مہ غیچی نو ہائے ای ریشو ہے زومالو پاڑہ اسور--- پردوم راردو دی تو جم مہ لوڑے اوا کیچہ کوری اشکار کومان؟ ژو دی بوخوشان بیٹی کوئی نو بیچوئے پردومو غورو سورا لوڑیک شروع کوری اسور۔ ہرونیہ پردوم ژوتے رے اسور کی اے ژو مہ غیچ کیچہ ہونی؟ ژو راردو کی لیے پیتانی، پردوم راردو کی مہ روم کیچہ ہوئے؟ ژو راردو کی غیڑی غیڑی ارقو چوکی شیر۔ ہرونیہ تان پردوم مہمیز کوری بھی ریشوؤ سورہ دیتی ہتو بوکی چوکی دمو چاک کوری ماری ژیبیک شروع کاردو--- ژوؤ ایا کی اوغ گیتی شونان لیبیاؤ، بیزان قڑوچ کوراؤ، بور بور دیتی غیچھان پردومو سورا دیتی ہال بیرو--- ہرونیہ پردومو پھوک ژان پولوئی خیق پوشور نسو توغوتے دیتی راردو کی کیچہ کی اوا ہوتام تو دی ہش بیٹی مانیسو یا آوزیتو اشکار کورے--- بیغار اچی جم کی چیچھیتاؤ تھے ریشوؤ اشکار کورے۔ ہرونیہ ژو تان ماڑہ بی تان بوکوت راردو کی اے کیمیری! ہموغار اچی وا چھوئے نو بوس پردومو سار اشکارو چالو چیچھی گیتی اسوم۔ تو مہ لو کیاوتکی مہ غیچ لیے پی وا روم غیڑی ارقو کی چوکیتائے متے لو دیت ریکو بیس نسہ نیشی غورو سورا تو لوڑیکا دیرو--- پھوک رو مودا اچہ ژو بشار کاردو کی اے کیمیری مہ غیچ کیچہ ہونی وا مہ روم کیچہ ہوئے؟؟ بوک راردو کی ته غیچ لیے پیتانی وا ته روم ارقو چوکی شیر ریکو سوم تان ژو مہمیز کوری بی ای مانیسو سورہ دیکو مانیس تو سرونگان پھورہ کوری التی گولو پیخھیرو۔ ژو بی گولو دیکو تو غو میہ چھیکو پردوم ٹھیخ کوری ہوسی راردو کی تان اوقاتار توری نیسیکو میہ چھیتی جابجا بین ہوئے!

نیسے بتے ژوؤ بی نیزی ہتو ماڑہ تارئے اوا بیا باتام وا ہموغار تان دوروتے بیم۔ ای نوغورہ تو درے اوبتی نوغورہ پروزیتائے-----

